

# ጳውሎስ ቴሴሎንቂያ አሳው ፃፌዳ ኮይር ኪታ ጌሉዋ

ቴሴሎንቂያ ማቂደኒያ ጌቴቲያ ርማ ቢታው ዋና ካታማቶ። ጳውሎስ ቴሴሎንቂያን አማኒያዋንቶ ሺሼዳዌ፣ ፒሊጲሲዮሳ ቢታ ዩኒ ቤዳዋፔ ጉዩያና። ጊደፔ አተሺን፣ አዩሁዳቱዋ አማኑዋ አካናው ማቲዳ አዩሁዳ ጊደና አሳቱ ጳውሎስ ታማሪሲያ፣ አማኑዋ ቲሚርቲያ ዶሴዳ ዲራው (1:8-10)፣ አዩሁዳቱ ጳውሎሳ ቃናቲዳ፣ ጳልቄሳ ዳንሌዲና። ሄዋ ዲራው ጳውሎስ ቴሴሎንቂያ ዩዲዳ፣ ቤሪያ ጌቴቲያ ጋዲያ ቤዳ። ታኪዳ ኢ ቆሮንቶሳ ጋኬዳ ዋዳ፣ ማታን አ ማዲያ ፂሞቶሲ ቴሴሎንቂያ ቢዳ ሲሞዋፔ ጉዩያን አማኒያ አሳ ሃናታ አው ቆንጨሲዳ ኦዳዳ።

ጳውሎስ ኮይር ኪታ ቴሴሎንቂያ አሳሲ ፃፌዳዌ፣ አማኒያዋንታ ሚኒሳናሳኔ ማንሐላናሳ። ኢ ኡንቱንቱ አማኑዋባኔ ሲቁዋባ ሎዎ ዋሪያ ሲሴዳ ዲራው፣ ያሳ ጋላቲ። ካሴ ኢ ኡንቱንቱ ጊደን ሄዙ ሳሚንታ (ኪት 17:1-9) ዳዔዳ ዋዳ፣ አይ ማላ ዳዑዋ ዳዔዳንቶ ኡንቱንታ አከኪሴ። ሄዋፔ ጉዩ ኪሪሰቶሳ ላዔሉዋ ዩሳ ጻሌዳዋን ዳንዳዳ ኦሻቱዋሲ ዛሩዋ ኢሚ። ሄ ኦሻቱዋፔካ አማራዳዋንቱ፣ «ኪሪሰቶሲ ሃ አላሚያ ሲማናፔ ካሴቲዳ ሃይቄዳ አማኒያ አሳይ፣ ኪሪሰቶሳ ሲሚይ ኢሚያ ሜጲና ዳዑዋ ሻኪ አካናው ዳንዳዩ? ኪሪሰቶሲ ሲሚዳ ያናዌ አዉዳ?» ያጊያዋንታ። ጳውሎስካ ሄ ጋኬቲዳ ዋዲያ ጎዔቲዳ፣ «ኪሪሰቶሳ ላዔሉዋ ዩሳ ቲሚርቲያ ሂደታን ናጊዳ ኢ ያና ጋካናው ዋፑ ጊዳ ሂንቱንቱ ኦሱዋ ኦሊቲ» ያጊዳ ኡንቱንታ ዞ።

## **ሼምፓቱዋ ኡባቱዋሲ ኢሜቴዳ ቃንሳ ቆፋቱዋ**

- ጌሉዋ (1:1)
- ጳውሎሳ ናሼቻኔ ጋላታ (1:2-3:13)
- አማኒያዋንቱ ዳዑዋ ካሌሊያ ኦጊያ (4:1-12)
- ዩሱሳ ላዔሉዋ ዩሳ ቲሚርቲያ (4:13-5:11)
- ዉርሴሳ ማቁዋ (5:12-22)
- ቁቲያ (5:23-28)

1 ኑኒ ጳውሎስ፡ ሲላሴኔ ግሞቶሲ ቲሴሎንቄን ዴዒያ አማኒያ አሳቶ ሃ ዳቢዳቢያ ፃፊቶ፤ ሄዋንቱ ያሳ ኑ አቡዋንቶኔ ጎዳ ዩሱሲ ኪሪሰቶሳንቶ፡ አቶ ኬካቴላይኔ ሳርቴላይ ገደ።

ቲሴሎንቄያ አሳ ዴዑዋኔ አማኑዋ

2 ኑኒ ዋሳን ያሳ ጋላቲዴ፡ ኡባ ዋዴ ሂንቴና ኡባቲዋ ሃሳዬቶ።

3 ኑኒ ኑ ያሳ፡ ኑ አጫዋ ሲንላን አማኑዋን ሂንቴንቱ ኦሌዳ ኦሉዋኔ፡ ሲቁዋን ሂንቴንቱ ዳቡራዳ ዳቡራ፡ ቃሲ ኑ ጎዳ ዩሱሲ ኪሪሰቶሳን ሂንቴው ዴዒያ ሂደታን ገንጨያ ገንጨዋ ኡባ ዋዴ ሃሳዬቶ።

4 ኑናዳን ያሳ ካሊያዋንቶ፡ ያሳይ ሂንቴና ሲቁያዋኔ ሂንቴና ባሬው ናና ኦላናው ደራዳዋ ኑኒ ኤሬቶ።

5 አዪሲ ጎፔ፡ ኑኒ ዋንጋላ፡ ዋልቃን፡ ጌሻ አያናኒኔ ሄ ዋንጌሊ ቱጭ ገዴዳዋ ወርሲ አማኒያዋን ሂንቴንቶ አሄዳዋፔ አቲን፡ አሳ ቃላ ፃላላን አሂቤይኮ። ኑኒ ሂንቴናና ዴዒያ ዋዴ፡ ሂንቴንቱ ዲራው ዋኒ ዴዔዴንቶ፡ ሂንቴንቱ ኤሪታ።

6 ቃሲ ሂንቴንቱ ዳር ዋዬቶፔካ፡ ጌሻ አያናይ አሜዳ ናሼቻን ኪታ አኬዲታ፤ ሄዋን ኑ ለሚሱዋኔ ጎዳዋ ካሌዲታ።

7 ሄዋ ዲራው፡ ማቂደኒያኒኔ አካዪያ ገያ ጋዲያን ዴዒያ አማኒያ ኡባቶ ለሚሱዋ ገዴዲታ።

8 አዪሲ ጎፔ፡ ጎዳ ቃላይ ሂንቴፔ ከሲዴ፡ ማቂደኒያኒኔ አካዪያ ፃላላን ሲሴቲቤና፤ ሺን ያሳ ሂንቴንቱ አማኒያዋ ኡባሳን ሲሴቲዳ። ሲሚ ኑኒ ሃሳያናው ኮሺሺን አቶዌ አይኔ ባዋ።

9 አዪሲ ጎፔ፡ ኑኒ ሂንቴኮ ቤዳ ዋዴ፡ ሂንቴንቱ ኑና ዋቲ ሞኬዴንቶኔ ቃሲ ሂንቴንቱ ሂንቴንቱ ኤቃው ኦሊያዋ አገዴ፤ ዋርዶቴና ዴዑዋ ያሳው ኦላናው ዋኒ ያሳኮ ሲሜዲቲንቶ፡ ኡንቴንቱ ባሬንቱ ሁጲያን ሃሳዪኖ።

10 ቃሲ ያሳ ናዓይ ዩሱሲ፡ ያሳይ ሃዪቁዋፔ ዴንፎዳዌ፡ ኑና ሲንላፔ ያና ያሳ ሃንቁዋፔ አሺያዌ ሳሉዋፔ ያናዋ ሂንቴንቱ ናገያዋ ኡንቴንቱ ሃሳዪኖ።

## 2

ጳውሎሲ ቲሴሎንቄያን ኦሌዳ ኦሉዋ

1 ኑናዳን ያሳ ካሊያዋንቶ፡ ኑኒ ሂንቴኮ ቤዳዌ ሜላ ገዴናዋ ሂንቴንቱ ሂንቴንቱ ሁጴው ኤሪታ።

2 ሺን ኑኒ ሂንቴኮ ያናፔ ካሴ ፒሊጲሲዮሳ ገያ ካታማን ዋዬቴዳዋኔ ቦሬቴዳዋ ሂንቴንቱ ኤሪታ፤ ዳር ጳልቁላይ ዴፖፔካ፡

ሂንቴንቶ አ ሚሺራቸዋ ቃላ ኦዳና ማላ፣ ያሳይ ኩሲ ሚኖቴላ አሜዳ።

3 ኩኒ ሂንቴና ዋሲያዌ ባሊዳ ዋይ ቱናቴላን ዋይ ጌኒያን ጊዳና።

4 ሺን ያሳይ ዋንጋላ ሃዳራ አካናው ኩኒ አማኔቴያዋንታ ጊዳና፣ ኩሲ ሄ ሃዳራ አሜዳ፤ ሄ አሜዳዋዳንካ ኩኒ ሃሳዬቶ። ቃሲ ኩኒ ኑ ዋዛና ያዋሲያ ያሳ ናሼቸያዋዳን ሃሳዬቶቴ አቲን፣ አሳ ናሼቸያዋዳን ሃሳዮኮ።

5 ኩኒ ሂንቴኮ ጨሚያ ሃሳያና፣ ዋይ ኩኒ ዮራ ጌንሌያ ሃናታን ዪቤናዋ ሂንቴንቱ ሎይሌ ኤሪታ፤ ያሳይካ ኩሲ ማርካ።

6 ኩኒ አሳቴ፣ ዋይ ሂንቴቴ፣ ዋይ ሃራንቱ ኦቴኔካ ቦንቸዋ አካናው ኮዪቤይኮ።

7 ኩኒ ኪሪሰቶሲ ኪቴዳዋንታ ጊዳዴ፣ ቦንቸዋ ሂንቴንቱቴ አቻናው ዳንዳዬቶ። ሺን አታ ባሬ ናናቱዋ ሲቁዋን ዲቸያዋዳን፣ ሂንቴንቱ ጊዳን አሺኬ ጊዳዴ።

8 ሂንቴንቱ ኩሲ ዳር አልዎ ጊዳዳ ዲራው፣ ያሳ ዋንጋላ ሂንቴንቶ አማናዋ ያላላ ጊዳናን፣ ኑ ዴዑዋካ ሂንቴንቶ አማናው ጊሊ ኡቲዳ፤ አዪሲ ጎቴ፣ ሂንቴና ኩኒ ሎይሌ ሲቄዴ።

9 ኩናዳን ያሳ ካሊያዋንቶ፣ ኑ ኦሱዋኔ ኑ ዳቡራ ሂንቴንቱ አኬኪታ፤ ሂንቴንቶ ያሳ ሚሺራቸዋ ቃላ ኦዳዴ፣ ሂንቴና አዪኔ ዋዪሴና ማላ፣ ቃማኔ ጋላሲ ኩኒ አሌዴ።

10 ኑ ዴዑ ሂንቴንቱ ማታን፣ አማኒያዋንቱ ማታን፣ ጌሻ፣ ዲሎኔ ቦሬቴናዋ ጊዳያዋ ሂንቴኔ ያሳይ ማርካ።

11 ኩኒ ሂንቴንቶ ሁጲያን ሁጲያን አዉ ባሬ ናናው ሃኒያዋዳን ሃኔዳዋ ኤሪታ።

12 ኩኒ ሂንቴና ዘሬዳ፤ ሚንሌሌዴኔ ሂንቴንቶ ማርካቴዴ። ሃዌኔካ ሂንቴና ያሳይ ያሳ ናሼቸያ ዴዑዋ ሂንቴንቱ ዴዳናዳናኔ አ ካዉቲላኔ አ ቦንቸዋ ጌላናዳና።

13 ሂንቴ ኑቴ ያሳ ቃላ ቱማ ጊዳዳዋዳን አኬዳ ዋዴ፣ ያሳ ኪታዳን አኬዳዋቴ አቲን፣ አሳ ኪታዳን አኪቤና ዲራው፣ ያሳ ቃሳይ አማኒያ ሂንቴናን ኦሌ፤ ሄ ጋሱዋን ኩኒ ያሳ ኡባ ዋዴ ጋላቲቶ።

14 አዪሲ ጎቴ፣ ኩናዳን ያሳ ካሊያዋንቶ፣ ኪሪሰቶሲ ዬሱሳን አቲዋ ጊዳዳ ዪሁዳ ጊያ ጋዲያን ዴዒያ አማኒያዋንታ፣ ሂንቴንቱ ለሚሰቲታ፤ ሄዋንቱ ያሳ አማኒያዋንታ። አዪሁዳቱ አንቱንታ ዋዪሴዳዋዳን፣ ሂንቴንቱ ቢታ አሳይካ ሂንቴና ዋዪሴዳ።

15 ሄ አዪሁዳቱ ጎዳ ዬሱሳኔ ናባቱዋ ዋዴዲና፤ ቃሲ ኩና ዬዳርሴዲና። ኡንቱንቱ ያሳ ናሼቸኪና፤ አሳ ኡባካ ኢዲና።

16 አዪሁዳ ጊዳና አሳይ አታና ማላ፡ ኮኒ ከንቱንቶ ቃላ ኦዲያዋ ዲጊኖ። ቃሲ ከንቱንቱ ናጋራይካ ኡባ ዎዴ ዳሪ ዳሪ ቤ። ሺን ወርሴላን ያሳ ሃንቁ ከንቱንቱ ቦላ ዎዴዳ።

ጳውሎሲ ቲሴሎንቂያ አሳ ላዔንሉዋ ያሞሳናው አሞቲዳ አሙዋ

17 ሺን ኑናዳን ያሳ ካሊያዋንቶ፡ ኮኒ ኑ ቆፋን ጊዳናዳን፡ አሳቲላ ፃላላን ሂንቲፔ ጉላ ዎዴው ሻኬቲዳ ዎዴ፡ ሂንቲና ዳር ላሞቲዳ፡ አይፊያን ቤዓናው ሎይሊ ኮዬደ።

18 አዪሲ ጎፔ፡ ኮኒ ሂንቲኮ ሲሚዳ ባናው ኮዬደ። ኡባ ታኒ ጳውሎሲ ዛራ ዛራዴ ሂንቲኮ ባናው ማላ ቤዓዲ፤ ሺን ሴፃናይ ኑና ዲጊዳ።

19 አዪሲ ጎፔ፡ ኑ ጎዳ ዩሱሲ ኪሪሰቶሲ ዪያ ዎዴ፡ ኮኒ ቤዓና ጊዴ ናሼቻን ናጊያዎ፡ ዎይ ኑ ናሼቻይ፡ ዎይ ኮኒ ጩቁቲያ አኪሊሊ ኦኔ? ሂንቲና ጊዲኪቲዬ?

20 አዪሲ ጎፔ፡ ሂንቲንቲ ኑ ቦንቹዋኔ ኑ ናሼቻ።

### 3

1 ሄዎ ዲራው፡ ኩሲ ጌንጫናው ዳንዳዬቲናን አጻዳ ዎዴ፡ አቲና ጊያ ካታማን ኑሬካ አታናው ቆፋ ቃቹደ።

2 ሂንቲና ዘራናዳኒኔ ሂንቲንቲ አማኑዋን ሂንቲና ሚኒሳናዳን፡ ያሳው ኦሊያ ኑ አሻ፡ ኑናና አቲፔ ኪሪሰቶሳ ሚሺራቹዎ ቃላ ኦዲያ ዲሞቶሳ ሂንቲኮ ኪቲደ።

3 ሃ ዎዩያ ጋሱዋን ሂንቲፔ ኦኒኔ ጉዬ ሲሚና ማላ፡ አ ኪቲደ። ኮኒ ሄዎ ደሬቲዳዎ ሂንቲንቲ ሂንቲንቲ ሁጹው ኤሪታ።

4 አዪሲ ጎፔ፡ ኮኒ ሂንቲናና ዴዲዳ፡ ኮኒ ዋዬታናዎ ካሴቲዳ ሂንቲንቶ ኦዴደ፤ ቃሲ ሂንቲንቲ ኤሪያዎዳንካ ካሴ ሄዎዳን ሃኔዳ።

5 ሄዎ ዲራው፡ ቃሲ ጌንጫናው ታው ዳንዳዬቲናን አጻዳ ዎዴ፡ «ኦኒ ኤሪ ፃላሂያ ካፑ ሂንቲና ፓጩናን አጌና፡ ኑ ዳቡራዩካ ማላ ጊዳናን አጌና» ያጋዴ ሂንቲንቲ አማኑዋ ኤራናው ዲሞቶሳ ሂንቲኮ ኪታዲ።

6 ሺን ሃዲ ዲሞቶሲ ሂንቲንቲ ማታፔ ኩኮ ዪዳ፡ ሂንቲንቲ አማኑዋባኔ ሂንቲንቲ ሲቁዋባ ሂንቲንቶ ሚሺራቹ ጊዴ ኩሲ ኦዴዳ። ቃሲ ኮኒ ሂንቲና ቤዓናው ላሞቲያዎዳን ሂንቲካ ኑና ቤዓናው ላሞቲዳ፡ ኡባ ዎዴ ኩሲ ሎፖባ ቆፒያዎ ኢ ኦዴዳ።

7 ሃዎ ዲራው፡ ኑናዳን ያሳ ካሊያዋንቶ፡ ኑ ዎዩያኒኔ ኑ ቱጋን ኡባን ሂንቲንቲ አማኑዋ ባጋና ሂንቲዋን ኑ ሚኒቲደ።

8 ጎዳን ሚኒዴ ሂንቲንቲ ዴፖፔ፡ ኮኒካ ሃዲ ዴዴቶ።

9 አዩሲ ጎፔ፣ ኮኒ ሂንቴባው ያሳ ጋላቴቶ። ኮኒ ኑ ያሳ ሲንላን ሂንቴንቴ ዲራው ዳዒያ ናሼቻ ኡባው አ ዳር ጋላቴቶ።

10 ኮኒ ሂንቴና ቤዓናውኔ ሂንቴንቴ አማኖ ፓጩዳዎ ኩንላናው። ቃማኔ ጋላሲ ኑ ኩሚንላ ዎዛናፔ ያሳ ዎሴቶ።

11 ኑ አው፣ ኑ ያሳይ ባሬ ሁጰው፣ ቃሲ ኑ ጎዳይ ዩሱሲ ኪሪሰቶሲ ኮኒ ሂንቴቱ ቢያ ኦጊያ ኑሲ ጊጊሶ።

12 ኮኒ ሂንቴና ሎይሊ ሲቂያዎዳን፣ ጎዳይ ሂንቴንቴ ኢቱ ኢቱዎ ሲቂያ ሲቂዎኔ ቃሲ አሳ ኡባ ሲቂያ ሲቂዎ ሂንቴንቶ ዳሪሶኔ ጉጀ።

13 ኑ ጎዳይ ዩሱሲ ባሬ ጌሻቱዎ ኡባና ዪያ ዎዴ፣ ኑ ያሳ፣ ኑ አወዎ ሲንላን ሂንቴ ዎዛናይ ጌሻኔ ፖኩ ባይናዎ ኡዲዴ፣ ሂንቴና ኢ ሚንሴሉ።

# 4

## ያሳ ናሼቹያ ዴዑዎ

1 ሲሚ ወርሴላን፣ ኑናዳን ያሳ ካሊያዎንቶ፣ ያሳ ናሼቻናው ሂንቴንቴ ዋኒ ዳዓናው ቤሲንቶ፣ ኑፔ ታማሬዲታ። ሄዌ ሂንቴንቴ ካሴይፔ ዳዒያ ማራ፤ ሽን ሃዒ ሂንቴንቴ ካሴዎፔ ሎይሊዴ ኦላናዳን፣ ጎዳ ዩሱሳ ሱንላን ሂንቴና ዎሴቶኔ ዘሬቶ።

2 አዩሲ ጎፔ፣ ኮኒ ጎዳ ዩሱሳ ማታ ባጋና ሂንቴንቶ አሜዳ አዛዙ ሃቃዌንቶ፣ ሂንቴንቴ ኤሪታ።

3 አዩሲ ጎፔ፣ ያሳይ ሂንቴፔ ኮዪያዌ አዬ ጎፔ፣ ሂንቴንቴ ጌሻ ጊዳናዎኔ ዎሹሚያዎ ኡባና አጋናዎ ኮዬ።

4 ሂንቴንቴ ሁጲያን ሁጲያን ጌሻቴላኒኔ ቦንቹዎን ሂንቴንቴ ማቹያና ዎቲ ዳዒኔንቶ \* ኤራናው ቤሴፔ አቲን።

5 ያሳ ኤሬና አማኔና አሳቱዎዳን፣ ሎይሊ አሞቲያዎን አካናው ቤሴና።

6 ኮኒ ቃሲ ካሴ ሂንቴንቶ ኦዴዳዎዳኒኔ ሂንቴና ሚኒሲ ዘሬዳዎዳን፣ ጎዳይ ሃዎ ማላባን ኡባን ሃሉዎ ኬሲያዎ ጊዲያ ዲራው፣ ኦኒኔ ሃ ዩወዎን ባሬ ኢሻ ናቃናውኔ ጨማናው ቤሴና።

7 አዩሲ ጎፔ፣ ያሳይ ኑና ጌሻቴላን ዳዓናው ዌሴዳዎፔ አቲን፣ ቱናቴላን ዳዓናው ዌሲቤና።

8 ሃዎ ዲራው፣ ሃ ቲሚርቲያ ኢዲያ ኦኒኔ ሂንቴንቶ ባሬ ጌሻ አያና አሚያ ያሳ ኢፃፔ አቲን፣ አሳ ኢፃና።

\* 4:4 ጌሻቴላን ቦንቹዎን ሂንቴንቴ ማቹያና ዎቲ ዳዒኔንቶ፣ ጉሳይ ባሬ አሳቴላ ናጊዴ ጌሻቴላን ዳዓናው ኮሺያዎ ቤሴ።

9 ሂንቴ ሂንቴንቴ ሁጲያን ኢቱ ኢቱዋ ሲቃናዳን፣ ያሳይ ሂንቴና ታማሪሴዳ ዲራው፣ ሂንቴንቴ ሂንቴንቴ ኢሻቱዋ ዋቲ ሲቃናው ቤሲንቶ፣ ኩኒ ፃፋናው ኮሼና።

10 ቃሲ ማቁደኒያ ቢታ ኡባን ዴዲያ ኢሻቱዋ ኡባቱዋ ቱሙ ሂንቴንቴ ሰቂታ። ሺን ኑናዳን ያሳ ካሊያዋንቶ፣ ሂንቴንቴ ሄዋፔ ጉጂ ጉጂዴ ኡንቴንታ ሲቃና ማላ፣ ሂንቴና ዋሴቶ።

11 ኩኒ ካሴ ሂንቴንቶ ኦዴዳዋዳን፣ ዋፑ ጌዳ ዴዐዋ ዴዒቱ። ቃሲ ሂንቴና ኮሺያዋ ዴማናው፣ ሂንቴ ኩሺያን ኦሊቱ።

12 ሄዋ ጊደፔ፣ አማኔናዋንቴ ማታን ሂንቴንቴ ቦንቼታናኔ ቃሲ ሂንቴና ኮሺያባው ኦናኔ አዉዳሺኪታ።

ጎዳይ ዪያ ዎዴ ሃዪቄዳ አሳይኔ ፓፃ ዴዲያ አሳይ ሃናናባ

13 ሺን ኑናዳን ያሳ ካሊያዋንቶ፣ ሂንቴንቴ ሂደታይ ባይና አሳቱዋዳን ካዮቴና ማላ፣ ሃይቄዳ አሳቱዋባ ሂንቴንቴ ኤራና ማላ ኮዬቶ።

14 ኩኒ ዬሱሲ ሃዪቄዳዎኔ ቃሲ ሃዪቄዋፔ ኢ ዴንዴዳዋ አማኔቶ፤ ሄዋዳንካ፣ ያሳይ ዬሱሳ አማኒዴ ሃዪቄዳዋንታ ዬሱሳና አሃናዋ አማኔቶ።

15 አዪሲ ጎፔ፣ ኩኒ ሂንቴንቶ ኦዲያ ጎዳ ቃላይ ሃዋ፤ ኩኒ፣ ጎዳ ለዒንሱዋ ዩሳ ጋላሳይ ጋካናው ሃዋን ፓፃ ዴዲያዋንቱ፣ ሃይቄዳዋንቱፔ ካሴቶኮ።

16 አዪሲ ጎፔ፣ ጎዳይ ባሬ ሁጲያን ኣዛዙዋና፣ ኪታንቻቱዋ ካፑዋ ኮሻና፣ ያሳ ማላካታ ጊሬፋና ሳሉዋፔ ዎቆና። ኪሪሰቶሳ አማኒዴ ሃዪቄዳዋንቱ ካሴቲዴ ሃዪቄዋፔ ዴንዳና።

17 ሄዋፔ ጉዪያን፣ ኩኒ ሄ ዎዴ ፓፃ ዴዲያዋንቱ፣ ጎዳና ጫርኩዋ ጊደን ጋኬታናው ኡንቴንቴና ኢቲፔ ሻሪያን ዴንዳና። ሄዋ ዲራው ኩኒ ጎዳና ኢቲፔ ኡባ ዎዴ ዴዓና።

18 ሄዋሲ፣ ሃ ቃላን ኢቱ ኢቱዋ ሜንሌሌቱ።

5

ጎዳ ዩሳ ጊጊዴ ናጊቱ

1 ሺን ኑናዳን ያሳ ካሊያዋንቶ፣ ሃ ዬዋቱ አዉዴ ሃናኔንቶ፣ ዎዲያኔ አጌና ሂንቴንቶ ፃፋናው ኮሼና።

2 አዪሲ ጎፔ፣ ጎዳ ጋላሳይ ካዪሱ ቃማ ዪያዋዳን ያናዋ ሂንቴንቴ ሎይሊ ኤሪታ።

3 አሳይ፡ «ኡባባይ ሳራ፤ አያይካ ሃኔና» ጊሺን፡ ማጫ አሳ ዬሉ ኦይቂያዎዳን፡ ባሻይ ኡንቲንቲ ቆፐናን ኡንቲንቲ ቦላ ያና። ኡንቲንቲ ሙሉካ ኬሲ አኪኪኖ።

4 ሺን ኦናዳን ያሳ ካሊያዎንቶ፡ ሄ ጋላሳይ ሂንቲንቶ ካዬሱ ዪያዎዳን ያናው ሂንቲንቲ ቋማኒ ዳዒኪታ።

5 ሂንቲ ኡባይ ፖዑዎ አሳኔ ጋላሳ አሳ፤ ኮኒ ቃማ አሳ ዎይ ቋማ አሳ ገደኮ።

6 ሄዎ ዲራው፡ ኮኒ ሃራቱ ጌሚዒሺያዎዳን ጌሚዒሻናው ቤሴና። ኮኒ ቤጎታናውኔ ዎጋን ዳዓናው ቤሴ።

7 አዪሲ ጎፔ፡ ጌሚዒሺያዎንቲ ቃማ ጌሚዒሺኖ፤ ማሶቲያዎንቲካ ቃማ ማሶቲኖ።

8 ሺን ኮኒ ጋላሳ አሳ ገዲያዎንቲ ዎጋን ዳዓናው ቤሴ። ኮኒ አማኑዎኔ ሰቁዎ ቲራን ዎሊያ ኦላ ሚሻዳን ኦይቂዳ፡ ኮኒ ሂደታን ናገያ አቶቲላ፡ ቢራታ ቆቢያዳን፡ ሁጲያን ዎላናው ቤሴ።

9 አዪሲ ጎፔ፡ ያሳይ ኦና ኦ ጎዳ ዬሱሲ ኪሪሰቶሳ ባጋና አቶቲላ ዳማናው ዶራዳዎፔ አቲን፡ አ ሃንቁዎ አካናው ዶሪቤና።

10 ኮኒ ፓፃ ገዲና ዎይ ሃዪቁዳዎንታ ገዲና፡ ኪሪሰቶሳና ኢቲፔ ዳዓና ማላ፡ ኪሪሰቶሳ ኦ ዲራው ሃዪቁዳ።

11 ሄዎ ዲራው፡ ሂንቲንቲ ቃሲ ሃዒ ኦሊያዎዳን፡ ሃራቱዎ ሚንጩላቴኔ ኢቲ ኢቲዎ ዲቺቲ።

**ወርሴላ ዞሪያኔ ሳርታ**

12 ኦናዳን ያሳ ካሊያዎንቶ፡ ሂንቲንቲ ገደን ኦሊያዎንታ፡ ሂንቲና አማኑዎ ኦጊያን ካሌሊያዎንታኔ ዞሪያዎንታ፡ ሂንቲንቲ ቦንቻና ማላ፡ ሂንቲና ዎሴቶ።

13 ኡንቲንቲ ኦሊያ ኦሱዎ ዲራው፡ ኡንቲንታ ሎይሊ ቦንቺቴኔ ሰቁቲ። ኢቲ ኢቲዎና ሳርቲላን ዳዒቲ።

14 ኦናዳን ያሳ ካሊያዎንቶ፡ ኮኒ ሂንቲና ዞሪቶ፤ ማራይ ባዪና ዳዑዎ ዳዒያዎንታ ሴሪቴ። ያዪያዎንታ ሚንጩላቴ። ዎልቂ ባይናዎንታ ማዲቲ። አሳ ኡባ ዳንዳዪቲ።

15 ኦኒኔ ኢታ ዲራው ኢታ ዛሬና ማላ ናጌቲቴ፤ ሺን ኡባ ዎዳ፡ ኢቲ ኢቶኔ ቃሲ አሳ ኡባው ሎዎባ ኦላናው ሚኒቲ።

16 ኡባ ዎዳ ናሼቲቴ።

17 ኡባ ዎዳ ቃንጻናን ያሳ ዎሲቴ።

18 ኡባባኒ ጋላቲቴ። አዪሲ ጎፔ፡ ኪሪሰቶሳ ዬሱሳ ባጋና ያሳይ ሂንቲፔ ኮዪያዌ ሄዎ።

19 ጌሻ አያና ታማ ቶዪሶፒቴ።

- 20 ቲምቢቲያ ቃላ ካጵፒቲ።
- 21 ኡባባካ ፓጩቲ። ሎፖባ ኦይቂቲ።
- 22 ኢታ ኦሱዋ ኡባፔ ሃኪቲ።
- 23 ሳሮቲላ ፆሳይ ባሬ ሁጾው ሂንቲና ኡባባኒ ፖሎ ጌሸ፤ ቃሲ ኑ ጎዳይ ዩሱሲ ኪሪሰቶሲ ዩያ ዎዴ፣ ፆሳይ ሂንቲንቱ ኣያና፣ ሸምፑዎን ኣሳቲላ ኢቲፔ ቦሬቲናዎን ፖሎ ኡዲዴ ናጎ።
- 24 ሂንቲና ጃሲያዌ ኣማኔቲዳዎ፤ ቃሲ ሄዎ ኢ ፖላና።
- 25 ኑናዳን ፆሳ ካሊያዎንቶ፣ ኑሲ ፆሳ ዎሲቲ።
- 26 ኢሻቲዎ ኡባ ጌሻ ዩሩዎ ዩሪዴ ሳሮቲቲ።
- 27 ሂንቲ ሃ ዳቢዳቢያ ጌሻ ኢሻቲዎ ኡባው ናባባናዳን፣ ጎዳ ሱንላን ሂንቲና ዎሳይ።
- 28 ኑ ጎዳ ዩሱሲ ኪሪሰቶሳ ኣጵ ከካቲላይ ሂንቲናና ኢቲፔ ጊዶ።



## **Ooratha Caaquwaa New Testament in Dawro (ET:dwr:Dawro)**

copyright © 2011 Wycliffe Bible Translators, Inc.

Language: Dawro

Translation by: Wycliffe Bible Translators, Inc.

### **Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Dawro

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

---

PDF generated using Haiola and XeLaTeX on 1 Oct 2024 from source  
files dated 29 Jan 2022  
585b63ca-b8e6-55c8-bfef-10bdc95ad69c